

東

華

錄

東華錄

康熙九

臣王先謙敬編

臣周澗澗蕃恭校

康熙八年己酉春正月丁未先是大學士金之俊予告在籍獲有  
詆毀伊之匿名帖呈送江南江西總督郎廷佐後又獲施君禮所  
投首詞稱前項謗帖乃施商雨等所作亦行呈送郎廷佐即行提  
人犯究審隨以謗帖首詞始末入告得旨匿名乃奸惡之徒造寫  
陷害平人如見其投擲拏獲理應照律從重治罪今施君禮稱爲  
施商雨所作乃不自行持首將帖擲於金之俊門首事屬可疑若  
因此匿名帖察拏究問則必致株連無辜且律載收審匿名帖者  
將審問之人治罪施商雨等俱不必察拏究問金之俊係大臣將  
匿名帖送總督究審郎廷佐係總督將匿名帖收受察拏生事不

合著議處至是吏部以金之俊郎廷佐並應罰俸議上得旨金之俊著革去宮保銜郎廷佐於病痊起用日降四級調用○戊申諭工部奉 太皇太后旨皇帝見居清甯宮卽保和殿也以殿爲宮於心不安可將乾清宮交泰殿修理皇帝移居彼處朕謹遵 懿旨移居爾部卽選擇吉日修理樸質堅固以仰副 太皇太后慈愛朕躬至意○甲寅以王光裕爲左副都御史由左僉都御史遷○兵部議奏賞卹征剿叛賊蘇利陣亡受傷官兵內五名因無妻子親屬無從賞給得旨此等甲兵雖無親屬但效力疆場傷亡可憫應酌量卹祭以後此等傷亡兵丁著照此例行○丙辰以修理 太和殿興工 上移居武英殿○庚申議政王等會議南懷仁奏吳明烜推算麻日差錯之處奉旨差大學士圖海等同欽天監監正馬祐測驗立春雨水太陰火星木星與南懷仁所指逐款皆符吳明

烜所稱逐款不合應將康熙九年一應厯日交與南懷仁推算得旨楊光先前告湯若望時議政王大臣會議以楊光先何處爲是據議准行湯若望何處爲非輒議停止及當日議停今日議復之故不向馬祐楊光先吳明烜南懷仁問明詳奏乃草率議覆不合著再行確議○辛酉轉劉鴻儒爲兵部左侍郎以李棠馥爲兵部右侍郎原任倉場侍郎○癸亥轉王清爲刑部左侍郎以張爾素爲刑部右侍郎原任○是月免直隸昌平陝西郿縣等五州縣去年水災額賦地廢者永豁除之

二月庚午議政王等遵旨會議前命大臣二十員赴觀象臺測驗南懷仁所言逐款皆符吳明烜所言逐款皆錯問監正馬祐監副宜塔喇胡振鉞李光顯亦言南懷仁厯皆合天象竊思百刻厯日雖歷代行之已久但南懷仁推算九十六刻之法既合天象自康

熙九年始應將九十六刻厯日推行又南懷仁言羅喉計都月孛星係推算厯日所用故開載其紫炁星無象推算厯日並無用處故不開載自康熙九年始將紫炁星不必造入七政厯日內又言候氣係自古以來之例推算厯法亦無用處嗣後亦應停止楊光先職司監正厯日差錯不能修理左祖吳明烜妄以九十六刻推算謂西洋之法必不可用應革職交刑部從重議罪得旨楊光先革職從寬免交刑部餘依議○辛未濬京師護城河○癸酉工部左侍郎吳正治丁憂命回籍守制○乙酉以陳秉直爲陝西按察使原任河南按察使○諭吏部兵部文官有撫循百姓綏理地方之責武官有訓練士卒防守地方之責必得其人乃克勝任朕巡幸近畿見通州知州歐陽世逢州同李正傑庸劣無才副將唐文耀不嫻武事俱著革職直隸各省總督提督巡撫所屬文武官員內有庸

劣無才不能勝任者應不時察參以副朕倚任之意乃直隸督撫竟不將歐陽世逢等官早行參奏理當議處姑寬宥一次著嚴飭行○辛卯禮部請封外藩蒙古諸王妃得旨察哈爾阿布奈親王之妻著停封餘如議阿布奈係出征所獲之人乃尙以固倫大長公主命爲親王恩遇優渥較之在內諸王及在外蒙古諸王止有太過並無不及乃在外諸王貝勒等每年俱來問安年節來朝阿布奈竟忘恩養八年以來不一朝請且每年遣人存問公主所生之子頒給恩賜阿布奈猶不親身一問 太皇太后及朕躬安公主所生幼子阿布奈理應撫養乃交與已分家之長子更屬何心此等情節著理藩院嚴察議奏○予故致仕太子太保吏部尙書明安達禮祭葬諡敏果

三月甲午朔調高辛印爲工部右侍郎

由兵部  
督捕調

○丁酉以郎廷相

爲河南巡撫

由四川布政使遷

○戊戌御史張登選奏提鎮統轄將領捍

衛地方其權甚重不可不共同選擇請照世祖章皇帝時定例提督總兵官仍著九卿會推開列恭候簡用至武官功績令兵部逐一詳開九卿公同查覈則無功者不敢倖進矣得旨提督及總兵官統轄邊疆地方關係重大以後缺出將應補授官員兵部冊內所載功績逐一開列著九卿科道會推具奏○己亥予故戶部尚書馬邇賽祭葬諡忠敏○辛丑諭戶部前以爾部題請直隸等省廢藩田產差部員會同各該督撫將荒熟田地酌量變價今思既以地易價復徵額賦重爲民累著免其變價撤回所差部員將見在未變價田地交與該督撫給與原種之人令其耕種照常徵糧以副朕愛養生之意至於無人承種餘田應作何料理著議奏尋部議請將無人承種餘田招民開墾從之○庚戌諭吏部原

任戶部尙書王宏祚係 皇考僉用之人效力年久可照原職補用○授西洋人南懷仁爲欽天監監副先是欽天監官按古法推算康熙八年厯以十二月置閏至是南懷仁言雨水爲正月中氣是月二十九日值雨水卽爲康熙九年之正月不當置閏置閏當在明年二月 上命禮部詳詢欽天監官多直南懷仁乃罷康熙八年十二月閏移置康熙九年二月其節氣占候悉從南懷仁之言○乙卯四川巡撫張德地奏採取柎木八十株得旨修造宮殿所用柎木不敷酌量以松木湊用○丙辰以劉兆麒爲浙江福建

總督

原任四川總督

夏四月癸亥朔日有食之○丙寅內國史院大學士衛周祚以疾請假命乘驛回籍調理准支俸病痊起用○癸酉以杜立德爲內國史院大學士

由吏部尚書遷

○予故原任浙江總督趙廷臣祭葬諡清



獻廕一子入監讀書○乙亥以金僑爲四川布政使原任河南右布政使○

丁丑 上幸太學釋奠先師孔子 御彝倫堂講周易尙書○戊

寅賜衍聖公孔毓圻及祭酒以下諸臣宴並賜袍服助教監生等

賜白金有差廣本監鄉試中額八名陪祀聖賢後裔內國史院中

書顏先毓等照例優敘生員孔興詢等十五人令入監讀書○己

卯調黃機爲吏部尙書由戶部調○辛巳給事中劉如漢奏請先行日

講次舉經筵選擇儒臣分班進講 上嘉其言下部議行○癸未

發帑金賑直隸眞定府屬饑○己丑調郝惟訥爲戶部尙書由禮部調

五月乙未調龔鼎孳爲禮部尙書由兵部調○丙申刑部戶部遵旨會

奏凡遇 聖駕出郊之處有叩闕者照刑部議衝突儀仗之律杖

一百發邊遠充軍其戶部議責四十六板之例相應停止得旨凡行

幸之處跪告交與部者若不審明事之虛實遽照衝突儀仗律則

此內或有冤枉亦未可定以後著審明所告之事虛者責四十板免其充軍○己亥內祕書院學士禪布奏伊祖達海巴克式蒙賜謚文成請立石碑以光永久得旨達海巴克式通滿漢文字於滿書加添圈點俾得分明又照漢字增造字樣於今賴之念其效力年久著有勞績著追立石碑○壬寅以王宏祚爲兵部尙書原任戶部尙書○戊申命議政王等拏問輔臣公鰲拜等諭曰前工部尙書員缺鰲拜以朕素不知之濟世妄稱才能推補通同結黨以欺朕躬又奏稱戶部尙書缺 太宗文皇帝時設有二員今亦應補授二員將馬邇賽徇情補用又鰲拜於朕前辦事不求當理稍有拂意之處卽將部臣叱喝又引見時鰲拜在朕前理宜聲氣和平乃施威震眾高聲喝問又科道官員條奏鰲拜屢請禁止恐身干物議閉塞言路又凡用人行政鰲拜欺朕專權恣意妄爲文武各官盡

出伊門下內外用伊奸黨大失天下之望穆里瑪塞本得訥莫佛  
倫蘇爾馬班布爾善阿思哈噶褚哈濟世馬邇賽泰璧圖邁音達  
吳格塞布達禮等結成同黨凡事在家定議然後施行且將部院  
衙門各官於啓奏後常帶往商議眾所共知鰲拜等倚仗兇惡棄  
毀國典與伊等相好者薦拔之不相好者陷害之朕念鰲拜舊臣  
遺詔有名寵眷過深望其改惡悔罪今乃貪聚賄賂奸黨日甚  
上違 君父重託下則殘害生民種種惡蹟難以枚舉遏必隆知  
而緘口將伊等過惡未嘗露奏一言是何意見阿南達負朕恩寵  
每進奏時稱贊鰲拜爲聖人著一併嚴拏勘審○戊午諭吏部近  
究審鰲拜等罪案知莫洛白清額阿塔皆其黨羽本當速問治以  
重罪念其既經用爲督撫畀以地方重任受事以來剔除加派火  
耗等弊姑從寬免罪仍留原任以後著益殫心勉力潔己率屬綏

輯地方愛養生民以副朕宥過留用之意○令各省衛所錢糧併

入民糧一體考成巡撫○己未以巴泰爲內祕書院大學士

原任內國

史院大學士

○理藩院遵諭議覆阿布奈無藩臣禮大不敬應論死革

去王爵不准承襲得旨阿布奈理應依議處死但向經恩遇姑從

寬免死著革去親王徽禁盛京○庚申康親王傑書等遵旨勘問

熬拜罪款熬拜係國家大臣背負先帝重託任意橫行欺君擅

權令文武各官盡出門下罪一引用內外奸黨致失天下人望罪

二與穆里瑪塞本得訥莫佛倫蘇爾馬班布爾善阿思哈噶褚哈

濟世馬邁賽泰璧圖邁音達吳格塞布達禮等結成奸黨一切政

事先於私家議定然後施行又將部院啓奏官員帶往私門商酌

罪三倚恃黨惡紊亂國政所喜者薦舉所惡者陷害皇上眷念

舊臣曲爲優容不思改惡聚貨養奸罪四上違遺詔下虐生民

凡結黨敗壞之處奉旨審問巧飾供詞罪五明知馬邇賽光泰噶達渾三族係 太宗文皇帝 世祖章皇帝時不用爲侍衛之人復擅行起用罪六於歸政之後卽將蘇克薩哈滅族又將白爾黑圖烏爾把等無罪枉殺罪七原任尙書蘇納海總督朱昌祚巡撫王登聯以八旗更換地畝不順其意擅加殺害罪八偏護本旗將別旗已定之地輒行更換罪九 皇上親政尊崇 聖母孝康皇后查取從前詔款熬拜不將配享 太廟 奉先殿典禮奏請施行此係欺 君輕慢 聖母之處罪十貪攬事權延挨不請辭政罪十一因內大臣噶布喇之女冊立 皇后心懷妬忌敢行奏阻罪十二謬稱濟世賢能授爲尙書罪十三妄奏戶部舊設尙書二員以同黨馬邇賽補居要地罪十四禁止科道陳言恐摘發情弊阻塞言路罪十五熊賜履條奏之事熬拜以爲劾己意圖傾害罪

十六馬邇賽部議賜諡奉有何顯功不准行之旨鰲拜不遵仍  
給與諡罪十七於 皇上前凡事不依理進奏多以舊時疏稿呈  
覽偏勒依允罪十八 御前呵叱部院大臣攔截章奏罪十九私  
買外藩人爲僕罪二十擅授敗陣革職達素等原職罪二十一議  
蘇克薩哈罪狀時止同班布爾善等定議恐大學士巴泰逆意不  
合不使與聞罪二十二因伊馬匹被偷將 御馬頭目並偷馬人  
自批盡行處決籍其家產入己罪二十三以俄訥喇哈達宜理布  
等在議政不肯附和卽截止蒙古都統不使會議罪二十四 先  
帝遺詔內鰲拜名列遏必隆之後乃不行遵奉凡起坐班行皆居  
遏必隆之右同黨噶褚哈於列名啓奏時亦將鰲拜名前列罪二  
十五聞遏必隆因 皇上傳喚養鷹之人激發怒言有成何 朝  
廷之說不行舉首罪二十六費耀色奉旨放鷹因其自行啓奏不

先關白輒加曠怒罪二十七 皇上行幸海子令鰲拜奏明 太  
皇太后乃不遵旨反云 皇上自奏罪二十八勢勒克什克之父  
妾配伊家人罪二十九以克什克父之墳墓有礙伊家風水偏令  
遷移罪三十逆惡種種所犯重大應將鰲拜革職立斬其親子兄  
弟亦應斬妻併孫爲奴家產籍沒其族人  
有官職及在護軍者均應革退各鞭一百披甲當差遏必隆同爲輔臣於白爾黑圖被鰲  
拜殺害之事不行勸阻惟自認軟弱巧飾供詞罪一遏必隆貪攬  
事權遲延不奏辭政罪二內大臣噶布喇之女冊立 皇后遏必  
隆心懷妬忌與鰲拜同入奏阻罪三鰲拜奏事時多以舊時疏稿  
蒙混進呈遏必隆不行勸阻罪四鰲拜更換地畝遏必隆雖欲停  
止不與爭執致蘇納海等被殺罪五吳爾喀係遏必隆屬下之人  
未經部議擅授官職罪六遏必隆奉 遺詔輔政鰲拜惡蹟不行

奏明深負 付託之旨罪七 遏必隆等議蘇克薩哈罪案恐大學士巴泰異議不使與聞罪八 鰲拜以馬匹被偷將馬羣頭領人等擅殺一案遏必隆既知其情不行舉首罪九 遏必隆因 皇上傳喚養鷹之人激發怒言有成何 朝廷之說藐視 皇上罪十

皇上行幸海子諭遏必隆等奏明 太皇太后遏必隆拊諉不奏罪十一 三等侍衛費耀色奉旨放鷹遏必隆因其自行啓奏不先關白輒亦忿怒罪十二 遏必隆欺 君誤國諸款審問時不以實供種種遮飾情罪重大應將遏必隆革職立絞未分家之子並妻爲奴其子所襲之公爵原係圖爾格所立不便仍留與遏必隆之子另選族人承襲其族人 有官職及在護軍者均應革退披甲當差班布爾善係宗室輔國公授爲大學士附和鰲拜藐視 皇上結黨行私恃負國恩罪一 班布爾善奏教習庶吉士二年期滿請



考試散館奉有再讀書一年之旨班布爾善因不順己意忿怒而出罪二戶部書役勞於新冒支錢糧案內牽連官員部議援赦免罪具奏班布爾善擬票駁回後部議照票籤擬罪班布爾善復改援赦一事處分前後互異罪三御史俞鐸以條奏不實奉旨嚴飭班布爾善擅寫擬罪票籤部議降二級調用班布爾善又改籤免罪後奉有革職之旨仍執拗奏請終免其罪罪四遇必隆鰲拜奉旨封公具本辭爵班布爾善以辭爵本章止有滿書令兼寫漢字聲揚輔臣之美詔事輔臣罪五恩賜諸王段匹多寡數目舊有定例班布爾善擅行增改罪六喀爾喀畢什克圖汗之子逃竄來歸奉旨封公班布爾善以爲過分不查定例屬令理藩院以後蒙古不必照此例優封罪七班布爾善諂事鰲拜無故將鰲拜誥命欲行更改罪八鰲拜等議蘇克薩哈之事班布爾善恐巴泰阻謀不

與同去罪九班布爾善於衙門一切公事自行專主不與同寮大學士票籤止同吳格塞料理罪十班布爾善與馬邇賽等結黨朝會之所避眾私語罪十一班布爾善將伊姨母之子蓋達擅授爲內閣典籍罪十二班布爾善擅用家僕裴天成充內院筆帖式罪十三班布爾善令馬邇賽之弟伊思哈在票籤處行走與馬邇賽等傳遞信息罪十四大學士等因鼓廳官員將不應奏之事代題公議處分班布爾善以爲不便參處恣行爭執罪十五班布爾善嫉戶部尚書王宏祚練達部務若留在部內恐伊黨馬邇賽凡事不得自專將王宏祚票擬革職罪十六科臣王之洙以隱匿應緝鹽商之事部議責革流徙奉旨依議班布爾善不遵旨行乃於次日改票豁免罪十七班布爾善引用奸黨致失人望罪十八班布爾善附從熬拜與穆里瑪等結黨凡事豫先在家議定然後施行

罪十九班布爾善所喜之人卽爲薦舉所惡之人卽爲陷害斂取財物罪二十班布爾善結黨妄行之情奉旨審問不從實供詭詞巧飾罪二十一種種情罪所犯重大應將班布爾善革職立斬係宗室改立絞將伊親生未分家子孫革去宗室妻子爲奴伊子化色塞圖姪薩木布博爾都俱革去輔國將軍爲閒散宗室鰲拜之姪塞本得內廷行走背負國恩依附鰲拜引用惡黨罪一鰲拜更改制度塞本得多爲贊助罪二塞本得與穆里瑪等結黨凡事至鰲拜家議定然後啓奏爲鰲拜羽翼聲揚威名罪三塞本得倚恃鰲拜之勢附和者卽爲薦引不與附和者卽加陷害罪四塞本得違旨剝民之事審問時巧辯具供罪五據三等侍衛費耀色首稱塞本得以奉旨交付內庫之整金絲飄翎響鈴塞本得不遵旨意令拆毀收納藐視 主上罪六塞本得凡事首惡情罪重大應將

塞本得革職卽行凌遲處死其親生未分家之子並妻爲奴吏部  
尙書阿思哈戶部尙書馬邇賽兵部尙書鳴緒哈吏部尙書泰璧  
圖鰲拜弟都統穆里瑪等助惡結黨背負國恩情罪重大均應革  
職立斬其親生未分家之子並妻爲奴馬邇賽已故應拋屍鰲拜  
之子那摩佛姪訥莫佛倫並鰲拜之黨希福阿林劉之源劉光插  
器阿南達布達禮濟世邁音達吳格塞額爾德黑郭爾渾等均應  
立斬鰲拜兄趙布太壻賴虎等應立絞以上各犯有親生未分家  
之子並妻爲奴家產籍沒其碩代等詔事鰲拜均應革職鞭責披  
甲當差家產籍沒有製職者亦另選族人承襲和碩敬謹親王蘭  
布娶鰲拜孫女爲妻倚勢得封問以鰲拜惡蹟狡稱不知應革親  
王爲鎮國公其鰲拜等族人坡爾噴等素不和睦未經來往均應  
釋放達素等係鰲拜擅授之官應革去鞭一百披甲當差其蘇爾

馬等提到再議得旨熬拜理應依議處死但念效力年久雖結黨作惡朕不忍加誅著革職籍沒拘禁趙布太那摩佛亦應依議處死著革職籍沒免死俱行拘禁遇必隆既無結黨之處著免罪革去太師及公爵其原有一等公爵留與伊子其族人爲內大臣侍衛護軍參領者俱著革去其有世職者著隨旗上朝其在驍騎營及部院衙門仍留原任阿南達理應依議處死著免死寬其籍沒賴虎插器佛倫布達禮劉光阿林希福等從寬免死各鞭一百插器布達禮佛倫著免籍沒劉之元額爾德黑郭爾渾等亦從寬免死碩代桑俄那木塔爾舒爾虎納克羅多等俱係微末之人一時苟圖進用俱從寬免罪照舊留任班布爾善革職卽行處絞塞本得著革職理應依議凌遲處死著改卽行處斬阿思哈噶褚哈穆里瑪泰璧圖訥莫俱著革職卽行處斬馬邇賽旣經身死不必

拋屍濟世邁音達吳格塞等俟到日再行究審具奏蘭布著革去親王授爲鎮國公穆舒席哈納卓靈阿那代等著免籍沒餘俱依議○諭吏部兵部鰲拜等以勳舊大臣受國厚恩奉 皇考遺詔

輔佐政務理宜精白乃心盡忠圖報不意鰲拜結黨專權紊亂國政紛更成憲罔上行私凡用人行政鰲拜欺藐朕躬恣意妄爲文武官員欲令盡出其門內外要路俱用伊之奸黨班布爾善穆里瑪馬邇賽塞本得阿思哈噶褚哈濟世訥莫泰璧圖等結爲黨與凡事先於私家商定乃行與伊交好者多方引用不合者卽行排陷種種奸惡難以枚舉朕久已悉知但以鰲拜身係大臣受累朝寵眷甚厚猶望其改行從善克保功名以全始終乃近觀其罪惡日多上負 皇考付託之重暴虐肆行致失天下之望遇必隆明知其惡緘默不言意在容身亦負委任朕以罪狀昭著將其事款

命諸王大臣公同究審俱已得實以其情罪重大皆擬正法奏聞朕復召鰲拜等面加鞫問情罪俱實本當依議處分但念鰲拜累朝效力年久且皇考曾經倚任朕不忍加誅姑從寬免死著革職籍沒仍行拘禁遇必隆無結黨之事免其重罪削去太師及後加公爵其原有一等公爵仍准留與伊子其班布爾善穆里瑪阿思哈噶褚哈泰璧圖塞本得訥莫或係部院大臣或係左右侍衛乃皆倚附權勢結黨行私表裏爲奸擅作威福罪在不赦皆已正法其餘皆係微末之人一時苟圖倖朕不忍盡加誅戮寬宥免死從輕治罪至於內文武官員或有畏其權勢而倚附者或有身圖倖進而倚附者本當察處姑從寬免自後務須洗心滌慮痛改前非遵守法度恪共職業以期副朕整飭紀綱愛養百姓之至意

六月壬戌朔調馬希納爲吏部尚書由戶部調○癸亥索倫噶爾圖等

進貢 上以伊等自遠方慕化來歸命於常例外加賞鞍馬等物

○以科爾科代爲兵部尚書由工部左侍郎遷○丙寅以恩額得爲工部

尚書源任禮部尚書○康親王傑書等奏熬拜案內內大臣巴哈係熬拜

胞弟前擊問熬拜時巴哈差往審理察哈爾阿布奈之事今提到

勘問巴哈不據實吐供隱庇巧飾是實應將巴哈革職立斬家產

籍沒其妻及未分家之子爲奴得旨巴哈效力年久免死寬其籍

沒著革職爲民○丁卯諭吏部朕夙夜圖治念切民生艱難加意

撫綏俾各安居樂業乃成久安長治之道邇年水旱頻仍盜賊未

靖兼以貪官污吏肆行朘削以致百姓財盡力窮日不聊生朕甚

憫焉爾等部院大臣科道各官或任要職或有言責著將拯救生

民疾苦切實裨益之處各據所見明白陳奏以備採用勿得妄行



藉端以無益之事塞責指陳負朕加惠黎元圖治求言之意爾部  
卽傳諭遵行○諭戶部凡奉差及直隸各省地方見任各官俱有  
董理公務並撫綏百姓之責宜各盡乃職以副朕差遣簡用之意  
近聞奉差官員及督撫提鎮等大小文武各官不思盡職惟圖利  
己及買良民爲奴甚至多買餽送親友此等違法妄行殊屬可惡  
以後著通行嚴飭若仍恣買良民者從重治罪決不姑恕○戊辰  
諭吏部兵部刑部近審鰲拜家人罪案據洪善尼滿供出總督白  
秉貞原任巡撫張自德尙書龔鼎孳庶吉士王彥阿達哈哈番金  
鼎驍騎校高鬚子正紅旗姓高之官伊等俱曾屬託行賄本當嚴  
究從重治罪但思此等屬託行賄者尙多非止伊等朕已有諭旨  
將內外各官苟圖倖進作弊者俱從寬免今供出各官亦俱從寬  
免罪以後務須洗心改過恪守法紀副朕寬宥之意如不改過仍

前作弊定行加等從重治罪決不輕恕○調岳思泰爲吏部左侍

郎由兵部督捕調

○以帥顏保爲吏部右侍郎

由內國史院學士遷

○令改造觀象

臺儀器從欽天監監副南懷仁請也○辛未轉塞色黑爲兵部左

侍郎以羅敏爲兵部右侍郎

原任

○以覺羅舒恕爲兵部督捕左侍

郎由一等侍衛遷

○轉羅多爲工部左侍郎以覺羅查哈喇爲工部右侍

郎由一等侍衛遷

○吏部奏請停止保舉仍按俸次升轉以杜鑽營賄賂

之風從之○壬申諭吏部兵部蘇克薩哈奉

皇考遺詔輔政蘇

克薩哈雖係有罪罪止本身不至誅滅子孫後嗣此皆鰲拜等與

蘇克薩哈不和挾讐滅其子孫後嗣深爲可憫其白爾黑圖等並

無罪犯因係族人連坐誅戮殊屬冤枉其蘇克薩哈原官及白爾

黑圖等官職俱應給還爾部將此案所革官員俱行查明議奏○

以米思翰爲戶部尙書

由禮部右侍郎遷

○都察院奏請禁藩王及大臣

家下商人各省貿易從之○康親王傑書等奏熬拜案內侍衛蘇爾馬係熬拜親姪前鞏問熬拜時蘇爾馬奉差往科爾沁今提到勘問蘇爾馬倚恃熬拜背負 皇恩是實應將蘇爾馬革職立斬家產籍沒其妻及未分家之子爲奴得旨蘇爾馬免死寬其籍沒著革職鞭一百○癸酉 上以直省罪囚舊遣恤刑官審錄今恤刑罷遣遇熬審時有非實犯死罪者宜具題減等如在京法司例命刑部通行直隸各省永著爲令○甲戌兵部議准宣諭安南使臣李仙根等事竣齋回安南國王黎維禱覆奏內稱謹遵旨將高平府石林廣源上琅下琅土地人民退還莫元清乞令莫元清歸屬本國等語從之○乙亥康親王傑書等奏熬拜案內理藩院右侍郎綽克託係熬拜姻黨前鞏問熬拜時綽克託差往蘇尼特編定扎薩克事務其子侍衛布顏圖係熬拜之婿拘禁候審今提到

綽克託一併勘問綽克託與鰲拜結黨諂媚往來是實應將綽克託革職立斬家產籍沒其子布顏圖亦應革職家產籍沒得旨綽克託免死寬其籍沒布顏圖亦免籍沒俱著革職鞭一百○丙子改直隸通薊道爲守道總管錢糧霸易道爲巡道總管刑名駐保定府其霸易道舊轄順天府屬州縣歸昌密道統理改爲霸昌道通薊道舊轄州縣衛所歸永平道統理改爲通永道○戊寅諭戶部朕繼承祖宗丕基又安天下撫育羣生滿漢軍民原無異視務俾各得其所乃愜朕心比年以來復將民間田地圈給旗下以致民生失業衣食無資流離困苦深爲可憫自後圈占民間房地永行停止其今年所已圈者悉令給還民間爾部速行曉諭昭朕嘉惠生民至意至於旗人無地亦難資生應否以古北等口邊外空地撥給耕種其令議政王貝勒大臣確議以聞○庚辰裁戶部

添設滿尚書○吏部奏蘇克薩哈案內文職官員革職者請復原官已故者准留廕生監生兵部奏武職官員革職者復原官已故者留廕生監生其原管佐領令本人子及族人承襲從之○癸未先是廣東都司劉世虎等駕舟巡海遇風颺泊至廣南國境內廣南國王差趙文炳等送劉世虎等歸粵帶來貨物船隻奉有確查議奏之旨至是禮部議劉世虎等帶去之兵尚有十九名未回應降二級其趙文炳等雖奉廣南國印文差遣實係中國之人或留或遣請旨定奪見在禁海其帶來之物不便貿易應交送戶部得旨廣南國差趙文炳等送劉世虎等歸粵殊爲可嘉著該督給以照驗遣歸廣南船貨不必入官仍給來使爲修理船隻之用其劉世虎等風颺是實著免罪○甲申以顧巴西爲禮部右侍郎由護軍統領遷○刑部奏旗下有民人投充及賣身之人入旗之後以從前舊

事赴部院衙門告理並倚恃旗下代親屬告訐者提解人犯牽累平民請嚴加禁止凡此等告控者不得准理從之○乙酉轉達哈塔爲理藩院左侍郎以阿穆瑚瑯爲理藩院右侍郎由一等侍衛遷○戊

子諭宗人府自古帝王建國親親賢賢義在並重我 太祖 太

宗 世祖以來篤念本支敦睦九族咸加愛恤欲其成立以共膺

福祿也朕思罪有大小法有重輕宗室犯罪遽行革除宗室朕心

不忍除 世祖章皇帝時定案外自順治十八年以後凡宗室有

犯罪革除宗室者著將情節一併查明具奏○諭刑部近聞官民

家人以自縊投水身死報部者甚多此皆因本主不加愛養或偏

責過甚難以存活故致身死非有迫切之情豈肯自盡以後官民

務須各將家人撫恤訓養勿得仍行偏責致死人命至重爾部卽

行曉諭申飭

秋七月壬辰朔吏部遵旨會同議政王貝勒大臣議原任禮部尙書祁徹白工部尙書葉成額兵部左侍郎石圖右侍郎圖爾特刑部左侍郎覺羅勒德洪工部右侍郎杭艾左都御史覺羅碩博會太僕寺卿覺和託太常寺卿覺羅班敦等呈稱職等爲鰲拜所嫉於康熙六年考察內無故解任降級不許於部院衙門用實爲冤枉查伊等俱係自陳解任降級應無庸議得旨議政王貝勒大臣會同將有無冤枉之處分別詳議具奏尋議政王等再議康熙六年考察時無故將伊等解任降級冤枉是實查覺羅碩博會既經年老告退應准復降級停其補用祁徹白以目疾原品解任俟病痊補用石圖以足疾降級應准復降級病痊補用葉成額理應復所降三級但所告狀內不開明授工部尙書處不合應仍降一級准復二級照品補用圖爾特覺羅勒德洪杭艾覺和託覺羅班敦

俱應復還原降級遇缺卽補從之○裁直隸山東河南總督○乙

未諭吏部刑部事務殷繁關繫人命甚屬緊要必得才猷練達者

方克勝任內國史院大學士對喀納諳練刑部事務著加太子太

保以內國史院大學士管刑部尚書事明珠著以原品候補○丙

申以帥顏保爲漕運總督由吏部右侍郎遷○丁酉復故輔政大臣蘇克

薩哈二等精奇尼哈番世職命其子蘇常淑承襲給還所沒家產

復故前鋒統領白爾黑圖一等阿思哈尼哈番世職命其子白爾

肯承襲○戊戌議政王等議鎮國將軍劉格告伊弟鎮國公哈爾

薩一案查劉格哈爾薩俱係謙郡王瓦克達子順治十年閒瓦克

達故議政王等議瓦克達曾得重罪郡王爵應不准承襲 世祖

章皇帝憐其子劉格哈爾薩命俱食奉國將軍品級俸至康熙六

年四月劉格哈爾薩以伊父瓦克達效力情由呈告時輔臣鰲拜



尚書馬通賽爲哈爾薩姻戚遂將哈爾薩封鎮國公授劉格爲鎮國將軍今劉格又以弟哈爾薩封公爵而已爲兄止得將軍爵呈告伊等俱係輔臣時夤緣所得之爵應將哈爾薩鎮國公併原有之奉國將軍品級俱革退劉格亦革去鎮國將軍仍食奉國將軍品級俸得旨 世祖章皇帝恩給哈爾薩奉國將軍品級俸著仍給餘依議○裁內三院滿洲學士缺一○己亥以京師旱命清理刑獄○庚子雨○壬寅諭吏部朕閱處分原任戶部尚書蘇納海等原案並無大罪鰲拜等但以爲撥地遲延遽行拏問多端文致誣陷不按律文任意將無辜處死原任總督朱昌祚巡撫王登聯於撥換地畝時見民間旗下困苦因有地方之責具疏奏聞輒以爲非其職掌越行干預亦不按律文冤枉處死伊等皆國家大臣並無大罪冤死深爲可憫理應昭雪以示仁恩作何恩卹予諡

及蔭子入監讀書爾部議奏○甲辰御史余縉奏民生安危視吏治吏治貪廉視督撫數年來從未有總督參一巡撫巡撫糾一總督互庇如此欲激清吏道拯救生民勢必不能請嚴立條例通行飭諭部覆無庸議得旨督撫瞻徇情面互相容隱雖明知弊端不肯舉發殊負委任之意以後務破情面凡有確見互相糾舉如有徇隱事發從重治罪不貸爾部院卽通行嚴飭○安親王岳樂等遵旨會議鑲藍旗奉國將軍巴爾堪告稱康熙七年六月被掌管簡親王家務之博博爾代倚恃親家熬拜權勢誣陷捏控以致降職隨訊兩造並傳都統誇岱等歷問前事洵屬冤抑應給還原職得旨巴爾堪給還三等輔國將軍博博爾代情罪可惡本當從重治罪姑從寬免著革去議政王大臣併掌管簡親王家務罰俸一年○辛亥以覺羅勒德洪爲吏部右侍郎

原任刑部左侍郎

○壬子諭禮

部所穀之禮大典攸關康熙元年停止今應遵舊制於明年舉行  
○乙卯刑部遵旨議覆吳明烜前因妄奏水星出見擬絞遇赦獲  
免今經復用又於 皇上前謊稱能推算南懷仁新法及命製星  
儀違限遲延星辰等項缺少舛錯應照奏事不實例杖一百僉妻  
流徙甯古塔得旨吳明烜姑從寬免流徙著責四十板○吏部議  
准御史余縉奏請復銓司舊制一定例銓曹漢人非進士出身者  
不與今舉人貢生皆得入選一定例四司每省用一人以周知通  
籍賢否今一概引用不分省分或重或缺一定例每歲甄別內升  
外轉各一人今停止甄別不復以名節自勵一定例銓部惟試差  
遣員外郎餘無馳傳外省者今鹽差關差雜然並遣一定例吏部  
不轉別部尊天官爲六卿之長則曹署亦與別部不同今四司員  
外郎與別部員外郎較俸並轉以上五款均宜更定從之○是月

四川成都進瑞麥七歧

八月壬戌諭宗人府吏部兵部凡令議政王貝勒大臣會議之事俱係國家重大機密事務會議之時理應極其慎密今聞會議之事尙未具題在外之人卽得聞知此皆會議處不加慎密不嚴行約束閒雜隨從之人以致聽聞傳說將國家大事豫先洩漏殊爲不合其諸王貝勒之長史閒散議政大臣俱著停其議政以後凡會議時諸王貝勒大臣務須慎密勿致洩漏爾衙門該部卽通行曉諭嚴飭○宗人府安親王岳樂等奏臣等遵旨查緣事革退宗室之人內班布爾善係與鰲拜結黨情罪重大其子郭禮博禮七十五觀音保及一女革去宗室之處應無庸再議得旨班布爾善之子本應依議念係宗室朕心不忍郭禮博禮七十五觀音保及女俱著爲閒散宗室○甲子以盧震爲偏沅巡撫

由內祕書院學士選

○乙

丑諭兵部刑部京師重地理應肅清近聞竊盜搶奪詐騙者甚多此皆步兵及五城司坊各官並巡捕營官兵稽察不嚴巡緝不力或番役等與盜交通受賄縱容以致奸惡之徒肆行無忌殊違法紀嗣後所司文武官嚴加巡察督率番役兵丁力行緝捕務期奸宄斂跡良民無擾如仍前弊所司各官槩治以重罪罔宥○丙寅以馬祐爲江甯巡撫由欽天監監正遷○辛未諭吏部前京察處分滿尚

書侍郎等因無事故被革俱給還原官令其候補今思滿漢諸臣被革相同朕原無異視應一體加恩京察內有漢尚書侍郎被革者察明議奏○康親王傑書等議覆南懷仁李光宏等呈告楊光先依附鰲拜捏詞陷人將歷代所用之洪範五行稱爲滅蠻經致李祖白等各官正法且推麻候氣茫然不知解送儀器虛糜錢糧輕改神明將吉凶顛倒妄生事端殃及無辜援引吳明烜謊奏授

官捏造無影之事誣告湯若望謀叛情罪重大應擬斬妻子流徙甯古塔至供奉天主係沿伊國舊習並無爲惡實蹟湯若望復通微教師之名照伊原品賜卹還給建堂基地許纘曾等復職伊等聚會散給天學傳槩及銅像等物仍行禁止西洋人乘安黨等該督撫驛送來京李祖白等照原官恩卹流徙子弟取回有職者復職李光宏黃昌司爾珪潘盡孝原降革之職仍行給還得旨楊光先理應論死念其年老姑從寬免妻子亦免流徙栗安黨等二十五人不必取來京城其天主教除南懷仁等照常自行外恐直隸各省復立堂入教仍著嚴行曉諭禁止餘依議○壬申諭吏部國家政務惟藉羣工贊理在京各衙門大小官員必各稱其職乃可以襄邛隆之化部院等衙門滿漢各官應行激敘以示勸懲大學士尙書及三品以上堂官俱著自陳三品司官及四品以下各官

爾部會同都察院詳加甄別具奏在外總督巡撫係封疆大臣職任緊要著該部院查明任內功過稱職與否詳加甄別具奏○諭吏部兵部內大臣侍衛文武大小各官各有職掌理宜精白乃心恪遵法紀循分盡職以副朕任用之至意近見有不安厥分交通在內近侍使令人員妄行干求或潛爲援引或畏威趨奉揆之臣誼殊爲不合朕施行政務懲創奸佞察其忠賢才能者用之以後如有匪類妄行陷人以圖僥倖自以爲賢希覬升遷及仍前干求趨奉者定行從重治罪不宥爾二部卽通行內外及包衣佐領嚴加申飭遵行○辛巳吏部遵諭查覈原任禮部尚書梁清標刑部左侍郎石申均係京察無故被革應復還原職從之○甲申先是吏部侍郎索額圖請解侍郎任願爲侍衛效力 上允之授一等侍衛至是命索額圖爲內國史院大學士○以原任副都統巴喀

同蘇納海撥地遲延枉革復其官○追賜故原任尙書蘇納海謚  
寢愍直隸總督朱昌祚謚勤愍直隸巡撫王登聯謚愍各祭葬  
如例廕蘇納海子瓦爾達朱昌祚子紱王登聯子盛唐入監讀書  
以通政使司左右通政大理寺少卿督捕左右理事官等缺用○  
乙酉以原任夏官正李祖白春官正宋可成中官正劉有泰秋官  
正宋發冬官正朱光顯等死非其罪各照原品級給祭銀○追賜  
原任掌欽天監事通政使湯若望祭葬○己丑改雲南尋甸府爲  
州歸曲靖府轄裁知府通判等缺○是月免江南鹽城所屯田去  
年水災額賦

九月壬辰予故原任浙江巡撫蔣國柱祭葬○甲午京師地震有  
聲○甄別各部院堂官禮部尙書布顏左都御史尼滿俱以原品  
隨旗行走兵部右侍郎李棠馥年老休致倉場總督工部尙書白



色純戶部右侍郎薩爾圖刑部右侍郎納布左副都御史哲庫訥  
阿思祐各降級隨旗行走內弘文院學士周天成革職○丙申吏  
部等衙門覆覈各督撫功過分別具題得旨山西陝西總督莫洛  
革職河道總督楊茂勳原任福建總督祖澤溥原任直隸山東河  
南總督白秉貞原任延綏巡撫張中第俱原品休致原任湖廣總  
督張長庚著以原品隨旗行走原任山西陝西總督盧崇峻削尙  
書銜留阿思哈尼哈番隨旗行走陝西巡撫白清額降四級隨旗  
行走湖廣巡撫林天擎留任直隸巡撫金世德降二級留任○庚  
子康親王傑書等奏工部尙書都統濟世兵部侍郎邁音達內祕  
書院學士吳格塞均係鰲拜同黨前擊問鰲拜時濟世等奉差福  
建巡海又劉之源子劉邦柱外任提督今一併提到勘問濟世等  
依附鰲拜結黨行私是實均應革職立斬家產籍沒得旨濟世吳

格塞著革職卽行處絞邁音達免其處死著革職籍沒家產鞭一

百劉邦柱免死寬其籍沒著革職鞭一百○壬寅山東邱縣孝子

王祚昌刲肝療父父病立起特旨給旌後不爲例○甲辰以石申

爲倉場侍郎

原任刑部侍郎

冀如錫爲兵部左侍郎管右侍郎事

原任工部侍郎

○大學士都統圖海奏臣以一身而膺二任才愧兼長且非國家

文武分途之制乞解機務專力戎行得旨卿才猷敏練簡任機密

重地著仍兼任大學士都統之職不必控辭○癸丑山西巡撫覺

羅阿塔以品行不正降四級隨旗行走○甲寅調恩額德爲禮部

尚書

由工部調

○以明珠爲左都御史

原任刑部尚書

吳達禮爲刑部右侍郎

原任吏部侍郎

○以鄂善爲左副都御史

由內祿書院學士遷

○以多諾爲山西陝

西總督

由內弘文院學士遷

○乙卯康親王傑書等遵旨議覆文武旣分職

掌巡撫例不管兵但有未設總督之省如遇軍需急務提督總兵

官仍應會同巡撫料理至副將以下武職官員若有貪酷殃民侵  
餉等事亦應巡撫察實題參從之○己未諭理藩院昔我 太宗  
皇帝遣發王師獲額哲等以歸念其爲察哈爾林丹汗之子乃元  
朝苗裔不忍廢絕特沛殊恩加封和碩親王迨額哲旣歿以其弟  
阿布奈襲王爵阿布奈宜思世受恩眷竭誠圖報乃上負國家豢  
養之仁累失外藩朝賀之禮情罪重大理宜削封但念 皇祖太  
宗 皇考世祖優容撫恤之意不忍奪其封爵其以阿布奈之子  
布爾尼仍襲封和碩親王

冬十月癸亥諭吏部朕思部院事務殷繁諸司官職掌必得賢能  
方克勝任今爾部但就部院見任官員調補其隨旗上朝者豈無  
賢能可備擢用乎可諭滿洲漢軍都統副都統等於阿達哈哈番  
以下拖沙喇哈番以上有明習滿文或通曉漢文夙具才幹堪任

部院者從公詳擇一旗數員咨送爾部俟各旗缺出與應升者並  
題補用○甲子 上幸南苑行圍○諭戶部朕巡歷所至凡御用  
器物皆係所司由京城供辦毫無取於地方除內廢之馬不用飼  
秣卽部撥馬匹所需芻豆亦屬無多向聞地方官指稱御用私派  
民閒豫爲儲侍既不銷算又不還民貪污官吏侵肥入己苦累小  
民重違法紀自後務加嚴禁儻有仍前借端科派者所司官嚴察  
參奏重懲如匿不上聞事發一併治罪爾部卽通行嚴飭刊示曉  
諭○乙丑以羅多爲河道總督由工部左侍郎遷馬雄鎮爲山西巡撫由內  
國史院學士遷達爾布爲陝西巡撫由山西布政使遷○己巳重修蘆溝橋成  
御製碑文○壬申以吳達禮爲工部尙書由刑部左侍郎遷○丁亥山西  
陝西總督莫洛奏提督張勇病廢宜罷得旨張勇久任邊疆著有  
勞績著仍留原任

十一月辛卯以穆成額爲山西布政使

由陝西按察使遷

○癸巳兵部議

奏福建水師提督施琅自海上投誠授爲右都督今已歸入鑲黃

旗應照例改爲精奇尼哈番但施琅投誠後勞績甚多請加伯銜

從之○丙申復設廣西左江巡道驛鹽巡道○予故原任兵部左

侍郎熊文舉祭葬○戊戌以納布爲戶部右侍郎

原任刑部侍郎

○己亥

以吳努春爲陝西按察使

由郎中遷

○甘肅巡撫劉斗提督張勇陝西

提督柏永馥會奏保留革職總督莫洛又西安百姓趙璉等叩闕

奏稱總督莫洛巡撫白清額居官清正萬民愛戴乞留原任以慰

輿情得旨原任山西陝西總督莫洛陝西巡撫白清額已經甄別

處分本當不復任用近據甘肅巡撫劉斗等合詞奏稱莫洛有益

地方兵民數千哀求代題留任又據百姓趙璉等奏稱莫洛白清

額實心實政老稚感悅保奏留任朕思簡用督撫原欲綏輯地方

愛養百姓今莫洛等既爲地方愛戴特順輿情免其處分莫洛白

清額俱著復還原官留任以後著殫心供職以副朕寬宥任用之

意達爾布著改爲山西巡撫馬雄鎮著候缺另用○以多諾爲刑

部侍郎新授山西陝西總督○甲辰以繆正心爲湖廣布政使由山西冀甯道遷○

壬子修造 太和殿 乾清宮成○癸丑 上由武英殿移居乾

清宮○甲寅以 太和殿 乾清宮告成頒詔天下○是月免直

隸無極江南江甯山西汾西河南睢州湖廣黃梅等三十州縣衛

被災額賦有差除陝西南鄭縣水坍田賦

十二月庚申朔雲南貴州總督甘文焜奏赧牛等四十九寨野苗

慕義來歸命加意撫綏又奏逆賊阿戎梗化已非一日遣兵撲剿

殺賊百餘人復聚踞阿魯山副將治秉忠陣斬阿戎擒殺七百餘

眾逆黨悉平下部議敘○丁卯金星晝見○戊辰以馬斯良爲湖

廣按察使

由郎中遷

○復設廣東惠潮道高雷廉道瓊州道改巡海道

爲廣肇道管理鹽法○己巳以徐國相爲江南布政使

原任山東右布政使

○裁江西九江等衛所守備五千總入以屯糧歸州縣徵收議裁

也○辛未 皇子承祜生○乙亥裁京倉滿漢監督二○復舉人

揀選知縣例○復設廣州左衛廣州後衛廣海衛雷州衛守備四

新會所香山所新甯所東莞所大鵬所平海所靖海所海康樂民

所海安錦囊所雙魚海浪所千總十○己卯顯親王福壽薨賜祭

造墳立碑諡曰懿○庚辰轉覺羅查哈喇爲工部左侍郎以禪布

爲工部右侍郎

由內祕書院學士遷

○以覺羅阿範爲左副都御史

由宗人府啟心

遷○是月免江南五河湖南平江等九縣被災額賦除安徽泗虹

等五州縣虛增開墾及水坍田賦五千餘頃○是歲朝鮮琉球入

貢

東華錄

康熙十

臣王先謙敬編

臣周澗蕃恭校

康熙九年庚戌春正月甲午河南巡撫郎廷相奏宋儒程氏後裔明時有五經博士二員緣流寇亂後廢襲久絕今查有程顥嫡裔程宗昌程頤嫡裔程延祀應請襲職從之○辛丑祈穀於上帝

奉太祖高皇帝太宗文皇帝世祖章皇帝配享○乙巳復

設河南分守河北道分巡南汝道○廣東廣西總督周有德奏請回旗守制允之○丁未諭兵部前以輔政大臣遏必隆明知鰲拜等樹黨亂政不豫行糾劾故坐之罪今思伊係皇考顧命大臣且勳臣子其咎止於因循瞻顧未嘗躬負重愆特爲寬宥仍以公爵宿衛內廷○復設湖廣分守武昌道分巡上荆南道分守鄖陽



道○己酉初直隸各省廢藩田產奉旨免其易價改入民戶名爲  
更名地內有廢藩自置之地給民佃種者輸糧之外又納租銀重  
徵爲累戶部議以久載全書不當蠲免得旨更名地內自置田土  
百姓旣納正賦又徵租銀實爲重累著與民田一例輸糧免其納  
租至易價銀兩有徵收在庫者許抵次年正賦○戊午子故原任  
刑部尙書李化熙祭葬

二月丙寅復設浙江分巡甯紹道分巡溫台道分守杭嘉湖道分  
守金衢嚴道○雲南貴州總督甘文焜奏定番州所屬崗渡等一  
百四十五寨苗蠻傾心歸化請納賦起科下部知之○壬申諭刑  
部盜案内論死者甚多其爲誣引株連亦或有之宜加詳勘至於  
夾棍乃慘痛之刑必不能已而後用其慎之毋忽○癸酉以金光  
祖爲廣東廣西總督馬雄鎮爲廣西巡撫

由內國史院學士遷

○丁丑先是

內國史院大學士衛周祚引疾乞歸 上念其勤勞有年給俸如

故俟病痊起用至是衛周祚以在籍支俸三年受恩過富具奏辭

俸得旨卿在任著有勞績回籍調理特給祿以資頤養可仍遵前

命祇受勿辭○江甯巡撫馬祐奏桃源縣等處連年水災請免帶

徵漕米得旨漕糧例不蠲免但該撫既稱桃源等處屢被水災民

生困苦與他處不同著確議具奏尋議康熙六七兩年分未完漕

米一萬六千六百四十石應准其蠲免後不爲例從之○庚辰復

設山東提督○癸未諭刑部向來定例流徙尙陽堡甯古塔罪人

於六月十二日停遣餘月皆令發往今思十月至正月俱嚴寒之

候所徙罪人貧者殊多衣絮單薄無以禦寒罪不至死而凍斃於

路甚爲可憫繼自今流徙尙陽堡甯古塔罪人自十月至正月及

六月俱勿遣○甲申敘克取銅山金門功授福建隨征總兵官一

等精奇尼哈番王之鼎爲三等伯○乙酉議政王等議定服制民  
公以下有頂帶官員以上禁止穿五爪三爪蟒段滿翠段圓補服  
黑狐皮黃色秋香色衣軍民人等禁止穿蟒段綉段金花段貂皮  
猞猁獬白豹皮袖子等服從之○增通惠北河南旺夏鎮中河南  
河管理河務滿分司六○是月免江南桃源等縣六年七年被水  
漕糧

閏二月戊子朔 皇子承慶生○庚寅諭工部朕經行城外見道  
旁枯骸惻然可憫或因爾部修治道途以致暴露亦未可知其令  
有司掩埋○辛卯子故原任刑部侍郎黃熙印祭葬○癸巳復設  
湖廣分守岳常道分巡辰沅靖道分守衡永郴道○戊戌子故致  
仕內國史院大學士金之俊祭葬諡文通○己亥兵部尙書王宏  
祚以老乞休命以原官致仕乘驛歸里仍給俸○甲寅調朱之弼

爲兵部尙書

由刑部調

○乙卯盛京刑部侍郎祁通額以病乞休允之

○丁巳諭禮部

皇考升遐倏經十載罔極之思時恫於懷山

陵在望未一展祭尤切悽愴朕擬於今歲八月恭行謁陵禮又

奉 太皇太后旨思念情愍亦欲詣陵朕敬遵 慈命躬侍前

往應行典禮及需用各項爾部詳議具奏○是月免福建龍溪等

五縣去年水災額賦江南高郵等六州縣八年以前漕運三萬山

東沂州魚臺等四十州縣衛起存銀二十二萬有奇

三月辛酉賜蔡啟傳等二百九十二人進士及第出身有差○以

馮溥爲刑部尙書

由左都御史選

○癸亥以杭愛爲盛京刑部侍郎

原任工部

侍郎○乙丑命洮岷魯班等七寺番僧止進貢馬匹青木香餘物停

止○丙寅諭吏部滿漢大小官員職掌相同品級有異應行畫一

著議政王貝勒大臣會同定議具奏○庚午復設四川湖廣總督

一福建總督一○辛未諭戶部十庫所有舊物與其虛置於此何

如分賜旗下貧丁爾部卽偕工部察有當給子者集議以聞尋戶

部工部議覆上命發庫內木棉絲布茶葉衣服弓矢等物令都

統等酌給各佐領下護軍撥什庫及甲兵之貧者○癸酉以杜篤

祐爲左都御史由吏部左侍郎遷○甲戌諭戶部江南壽州衛自順治六

年大水衛軍死徙田地荒蕪減存月糧銀兩無從徵收著豁免仍

令漕臣設法招墾○議政王等遵旨議覆滿洲大學士尙書左都

御史俱係一品侍郎學士副都御史通政使大理寺卿俱係二品

漢大學士原係正五品今爲二品尙書左都御史俱係二品侍郎

學士副都御史通政使大理寺卿俱係三品滿洲郎中係三品員

外郎係四品漢郎中係正五品員外郎係從五品今若將漢人官

員品級與滿洲畫一則在外升調品級不符查順治十五年會將

滿洲官員品級與漢人畫一後康熙六年將滿洲官員品級改爲  
照舊今應行畫一將滿洲官員品級照順治十五年之例其見在  
品級仍准存留以後補授之時照此定例補授從之○丁丑諭戶  
部兵部滿洲甲兵係國家根本雖天下平定不可不加重愛養近  
聞八旗甲兵牧養馬匹整辦器械費用繁多除月餉外別無生理  
不足贍養妻子家口朕甚憫焉月餉銀米應作何增給永著爲例  
爾二部會同詳議以聞尋議甲兵每人月增銀一兩歲增米二斛  
從之○己卯諭吏部等衙門時已入夏雨澤愆期皆由部院大小  
臣工因循舊習不能精白乃心公廉盡職以致政務失當有干天  
和爾等堂官宜力圖修省靖共職業嚴督所屬司官凡事秉公勤  
勵革除積弊毋得瞻徇情面仍稽察胥吏作好事有宜結者速爲  
完結勿借端屢駁圖遂己私其問刑等衙門一切訟獄務期平允

得情速審速結勿得株累無辜久淹羈禁爾等大小各官當實心  
修省毋視爲具文怠玩如故有負朕委任責成之意○甲申轉蔡  
毓榮爲吏部左侍郎調艾元徵爲吏部右侍郎由戶部調○丙戌轉嚴  
正矩爲戶部左侍郎以田逢吉爲戶部右侍郎由內閣史院學士遷○是月  
旱命禮部祈雨

夏四月丁亥朔復設江南分守蘇松常道分巡鳳廬道分巡徽甯  
道改淮海道爲淮揚道○復設福建分守興泉道分巡延建邵道  
其福州府福甯州海防事歸驛鹽道兼管興泉二府海防事歸興  
泉道兼管○己丑以蔡毓榮爲四川湖廣總督由吏部左侍郎遷○辛卯

御史李之芳奏 皇上因雨澤愆期特諭大小臣工力圖修省臣  
查吏部考功事例有不可不除者外官參罰處分降級革職條例  
甚多卽罰俸一項常有蒞官一二載罰俸至五六年有至十餘年

者雖廉能之官一遇小節細故卽不能久安其位亦屬可惜况則例紛紜胥吏欲輕則有輕條欲重則有重例事同法異總緣多立名色便於高下其手乞敕部院大臣將該部見行事例徹底釐定務使永遠可行下吏部議尋議請委滿漢司官將見行事例釐定盡一進呈 御覽欽定遵行從之○山東巡撫劉芳躅丁母憂命回籍守制○乙未吏部題順天府所屬州縣原係府尹管理今直隸錢穀刑名分隸守巡二道應將順天府所屬州縣錢穀歸守道管理刑名歸巡道管理從之○吏部議覆浙江巡撫范承謨奏仁和縣知縣丁世澍以繼母劉氏年老呈請終養查定例載父母年七十以上者終養並無終養繼母之例應無庸議得旨既有終養之例豈可分別生母繼母丁世澍准終養○兵部都察院遵旨議覆京城內外豪惡糾黨盜劫時聞城內責令步軍總尉步軍副尉



步軍校城外責令五城御史司坊官巡捕營弁每日巡緝城外各巷口照城內設立柵欄定更後官員軍民等不許行走犯者照例懲治並著爲令從之○己亥 上幸南苑行圍○甲辰轉艾元徵

爲吏部左侍郎調王清爲吏部左侍郎管右侍郎事

由刑部左侍郎調

○

吏部議覆御史徐旭齡奏凡降調官員百姓每每保留其中不無情弊請行禁止應如所請嗣後凡民保留降調官員者俱不准行仍交刑部治罪如被降之官果係清廉良吏許該督撫題請若係不肖或科道糾參將題請留任之督撫照以劣爲優例處分從之

○乙巳以鄂善爲陝西巡撫

由左副都御史遷

○以劉斗爲福建總督

由

肅巡撫遷

○丙午

上還宮

○戊申雨

○簡親王德塞薨賜祭葬立碑

諡曰慧○辛亥命工部通行直隸各省各官凡齒髫悉爲收瘞○

增江南清河宿遷及歸化隄三處同知各一主簿各一○乙卯以

袁懋功爲山東巡撫

原任雲南巡撫

○河決歸仁隄○戶部議覆貴州道

御史萬泰奏淮揚等處因歸仁隄決田地被淹災民流離應敕該督撫設法賑濟若賑米不敷確查鄰近州縣常平倉所積米穀酌量運赴淮揚專委廉幹官員實行賑濟從之

五月丙辰朔

孝康皇后升祔

太廟加上

尊諡曰

孝康慈

和莊懿恭惠崇天育聖章皇后頒詔加恩天下訪隱逸贍高年赦

殊死以下○癸亥以花善爲甘肅巡撫

由內弘文院學士遷

○以慕天顏爲

江蘇布政使

由福建興泉道遷

○諭禮部博爾濟金氏乃科爾沁冰圖郡

王額濟音之親叔額德台吉之子三等台吉阿郁錫之女選進宮中待年方欲冊封今遽爾長逝朕心深切軫悼宜追封爲妃其封號及應行禮儀爾部卽察例議奏尋允禮部議追封爲慧妃○丙寅以岳諾惠爲左副都御史

由大理寺卿遷

○轉張爾素爲刑部左侍郎

以馬紹曾爲刑部右侍郎高珩爲左副都御史

由宗人府府丞遷

○癸酉

都察院遵旨察議御史季振宜題參吏部尙書黃機以降級侍郎開列尙書一款查黃機回奏疏內並未申明乃稱自陳疏內開載明白故不重述洵屬巧飾又參黃機條奏降補官員疏內止就所降品級補授並未區別官職大小則知府降一級翻可補參議降二級翻可補僉事一款查黃機原疏內並無知府降調不令其補參議僉事字樣洵屬蒙混應將黃機解尙書任仍降級侍郎致仕又參黃機辦事似啞似聾言語半吞半吐其同事之尙書馬希納侍郎岳思泰等並未申明亦屬不合將馬希納等各降一級得旨黃機係大臣回奏時理應將始末明白陳出乃巧飾蒙混具奏殊爲不合馬希納岳思泰勒德洪蔡毓榮杜篤祐徇情庇護亦負委用之意姑從寬恕此一次以後著洗心滌慮改易前非竭誠勉勵

以盡職業○丙子禮部議覆御史張所志奏會典一書一代制度

攸關理應編輯昭示中外應令各部院衙門將 太祖高皇帝

太宗文皇帝 世祖章皇帝時定例及見行事宜查明送內院纂

修頒行天下永遠遵行從之○己卯 皇子承瑞薨○吏部題推

官已裁庚戌科二甲三甲進士俱應以知縣用從之○御史李之

芳奏今年考選庶常 皇上委內院閱卷京師闈傳謂取中上卷

二十四名係魏裔介使家人報信聞者無從辨其真僞幸我 皇

上親加遴選取中庶吉士二十七員與所傳名數姓氏不同於是

人心悅服獨是魏裔介以密勿大臣敢於漏消息而竊威福此其

心爲何心又魏裔介向因伊兄魏裔魯爲山東運使遂將敕書漢

文內私自增改令知府屬其統轄其後頒給兩淮運使敕書卽照

此藁謄寫被巡鹽御史馬大士以敕書清漢互異具奏發覺然後

查出底藁係魏裔介親筆添註翻使同官代爲受過典籍含冤降級又順治十八年魏裔介係候補之官 皇上登極恩詔三品以上京官廕一子入監讀書其候補者概未准與官廕監生及魏裔介身爲吏部尙書獨將其子魏嘉入十八年詔款欺蒙題廕又伊弟魏裔訥任江南淮安府桃源縣知縣因其邑荒殘又兼河患從無升任之官乃指稱伊族叔魏樹祥任江甯府同知將伊弟借端回避改補又纂修 世祖章皇帝實錄取各官編纂時魏裔介與班布爾善朋比相倚各用私人徑將素無才學刑部主事杜鎮選取伏乞 皇上卽賜乾斷嚴加處分以爲擅權害政之戒得旨這所參事情著魏裔介明白回奏○癸未調陳秉直爲江南按察使

由陝  
西調

六月戊子內秘書院大學士魏裔介遵旨回奏臺臣李之芳謂今

年考選庶常係臣使人報信臣與諸人非親非故所報何人李之芳如有確據卽宜糾參何得懸揣謂臣洩漏市恩耶李之芳又謂山東運使魏裔魯係臣之兄敕書內私自增改同官代爲受過典籍含冤降級吏部察議此一案時臣適告假歸里有何交結情面而諸臣肯代臣受過李之芳又謂臣順治十八年係候補之官不應廢子及身爲吏部尙書欺蒙題廢臣因糾參劉正宗摘發奸黨審實復職在順治十七年冬月十八年正月 世祖章皇帝賓天臣晝夜齋宿與在籍候補者不同隨例送廢吏部題奏奉有俞旨且臣之送廢在順治十八年五月內康熙二年五月內臣升尙書相隔甚遠安得以滿漢堂司公議具題奉旨俞允之事謂臣自行欺蒙乎李之芳又謂臣弟魏裔訥任桃源知縣因地方凋敝指稱族叔魏槐祥任江甯府同知借端回避臣祖魏純粹係明季甲辰

進士官至御史臣祖母程氏生臣父兄弟七人魏槐祥行居第七  
回避時取有甘結部覆在案至回避事例俱從官職卑者回避部  
覆自有成例與臣何涉李之芳又謂選取纂修 實錄官時將素  
無才學之杜鎮取用查杜鎮任刑部主事堂官令纂修律例部院  
考察會列一等何謂無文名取用且取入纂修各官乃臣衙門會  
同吏部公議公疏具題豈有阿私耶李之芳又謂臣與班布爾善  
朋比相倚臣在內院凡班布爾善有商議言無不盡亦時有相爭  
之事以鰲拜之勢能臣足迹不登其門况班爾布善與臣同官豈  
肯蹈朋比之事乎臣遭逢 世祖章皇帝知遇拔置憲長會參劉  
正宗劉祚遠等將伊從重處分伊等黨類切齒於臣久矣李之芳  
係劉正宗同鄉據其所參巧爲構誣皆屬無據臣恐報復之謀得  
售凡臣子非其黨類者皆可借端傾害矣至於臣識見庸下負乘

貽譏既被人言豈可覲顏復居綸扉之側伏懇 乾斷卽賜處分

以爲不職之戒得旨本內情節著質對察議具奏○丙申諭刑部

近覽章奏罪犯監禁踰限不行速審以致斃獄者甚多夫各犯自

有應得之罪未死於法先死於獄殊非慎刑之意朕心深爲不忍

爾部將踰限不結監斃幾人以上者作何嚴加處分詳議定例具

奏○丁酉命顯親王福壽子丹臻襲顯親王○壬寅以劉樅爲江

西布政使原任湖廣右布政使安世鼎爲江西按察使原任福建按察使○乙巳以

成格爲陝西按察使由郎中遷○甲寅西洋國王阿豐肅遣使瑪訥撤

爾達聶等進貢得旨西洋國地居極遠初次進貢著從優賞賚

秋七月丁巳江南江西總督麻勒吉奏准揚二府於五月終旬准

黃暴漲湖水泛溢百姓田畝廬舍被淹應亟行賑濟但各屬積穀

已爲上年賑給之用請暫那正項錢糧俟勸輸捐納補還正項戶



部議覆以正項不便動支應將鳳陽倉存貯及捐輸扣存各項銀米交賢能官員散賑如有不足勸諭通省各官設法捐輸得旨准揚百姓連被水災深可憫念著差部院廉能大臣一員作速前往踏勘果係被災已甚無以爲生卽會同督撫一面將正項錢糧動用賑濟若係次災卽照部議將各項糧米賑濟務使民霑實惠以副朕軫災恤民至意○己未宗人府等衙門奏前代舊制諸王薨逝將諡號載於封號之下本朝見行例諸王薨逝給與諡號勒碑不將封號刊勒恐後世之人難曉今臣等酌議薨逝諸王未予諡號者應於封號下加諡號一字已予諡號者仍加寫封號從之○予故工部尚書劉昌祭葬諡勤信○辛酉復設江西驛鹽道分巡贛南道分巡饒九南道○壬戌復設太僕寺漢正卿一滿少卿一以兵部所掌大庫場種馬場歸本寺管理○癸酉予故兵部侍郎

石圖祭葬○乙亥戶部議覆浙江福建總督劉兆麒奏請展報災限期查康熙七年會議夏災不過五月秋災不過八月地方官每慮愆期匿災不報應如所請仍照順治十七年定例夏災不出六月終旬秋災不出九月終旬從之○予故陝西巡撫白清額祭葬諡清獻○壬午湖廣巡撫林天擎以病乞休命以原官致仕○是月免直隸博野等二十九州縣水災額賦有差免江南丹徒金壇通賦

八月乙酉朔諭都察院國家朝儀大體所在貴於整齊嚴肅不止係堂陛之觀瞻亦以見臣心之敬肆諸王大臣有踰越班行交相接語或輕佻嬉笑禮不踰階而相與言又况其甚乎爾衙門監察御史侍班切近見而不糾豈真目未之覩皆緣畏事徇情所以如此都察院職任重大朕躬有失尙爾指陳王及諸臣乃不參奏揆

之事理實所未協今後有失儀者毋得容隱○壬辰吏部兵部遵旨議覆官員殉難陣亡俱係歿於王事優卹之例文武應行畫一從前已結之事無庸議此後文武官員或係殉難或係陣亡俱應照例錄用子弟一人給與加贈祭葬銀兩從之○乙未以董國興爲湖廣巡撫由內秘書院學士遷○命改內三院爲內閣其大學士學士官銜及設立翰林院衙門等官俱著察順治十五年例議奏○丁酉

上奉 太皇太后 皇太后謁 孝陵啟鑾○乙巳 上謁

孝陵○丙午 上詣 隆恩殿大祭○丁未 上詣 寶城致祭

奉 太皇太后 皇太后回鑾○庚戌吏部議覆廣東巡撫劉秉權奏廣東驛傳請歸併鹽法改爲鹽驛道卽以驛傳道改爲廣肇道轄廣肇南韶四府從之○兵部議覆貴州巡撫佟鳳彩奏貴州有紅黑二苗傍居險要時出劫掠乃亘古不服王化之逆種也仰

賴 皇上恩威遠播今那磨等共三十六寨苗人傾心嚮化呈送  
戶口糧冊應行該督撫加意撫綏務令得所從之○壬子 上奉

太皇太后 皇太后還京師○是月免直隸贊皇江南秦州等

十二州縣衛水災湖廣漢陽河南磁州等十五州縣衛旱災額賦  
九月戊午諭禮部天文關繫重大必選擇得人令其專心學習方  
能通曉精微可選取官學生令其與漢天文生一同學習有精通  
者俟欽天監員缺考試補用尋禮部議於官學內每旗選取十名  
交欽天監分科學習有精通者俟滿漢博士缺出補用從之○已  
未先是吏部奏臣部處分官員條例間有事蹟相同輕重不一者  
請將順治十八年後題准之例彙集參酌務令畫一簡明以昭法  
守奉旨俞允至是遵旨更定例款頒行天下○庚申以簡慧親王  
德塞弟喇布襲簡親王○戊辰以張彥珩爲廣東布政使

由雲南按察使

○壬申設雲南永昌守道○乙亥嚴禁內外官員餽遺○是月免直隸保定山東濰縣等十一縣被災額賦以浙江嘉興湖州水免耗米八萬有奇

冬十月丙戌先是 上遣和碩額駙吳應熊往雲南省視伊父吳三桂至是吳三桂奏八月二十六日仍遣吳應熊自滇赴京下部知之○丁亥浙江福建總督劉兆麒奏偽甯遠將軍林柏馨偽都督施驪率偽官百四十四員兵千六百九十名船三十隻自臺灣赴浙投誠下部議敘○庚寅予故內國史院大學士蔣赫德祭葬諡文端○辛卯賜武舉張英奇等二百人武進士及第出身有差○壬辰吏部奏舊例雙月補授各項官員俱按二八分分缺一員出五缺用大選之人四員推升之人一員不及五缺俱歸大選以致推升之官日漸壅滯嗣後請將上下月缺彙算大選之人補授

四員之後卽將推升之人補授一員不必拘定一月內算缺則推升官壅滯可疏通矣從之○癸巳諭禮部朕惟邇治之世不以法令爲亟而以教化爲先其時人心醇良風俗敦厚刑措不用比屋可封長治久安茂登上理蓋法令禁於一時而教化維於可久若徒恃法令而教化不先是舍本而務末也近見風俗日敝人心不古囂陵成習僭侈多端狙詐之術日工獄訟之興靡已或豪富陵轢孤寒或劣紳武斷鄉曲或惡衿出入衙門或蠹棍詐害善良在符之劫掠時聞讐忿之殺傷疊見陷罹法網刑所必加誅之則無知可憫宥之則憲典難寬念茲刑辟之日繁良由化導之未善朕今日欲法古帝王尙德緩刑化民成俗舉凡敦孝弟以重人倫篤宗族以昭雍睦和鄉黨以息爭訟重農桑以足衣食尙節儉以惜財用隆學校以端士習黜異端以崇正學講法律以儆愚頑明禮

讓以厚風俗務本業以定民志訓子弟以禁非爲息誣告以全良善誠窩逃以免株連完錢糧以省催科聯保甲以弭盜賊解讐忿以重身命以上諸條作何訓迪勸導及作何責成内外文武該管各官督率舉行爾部詳察典制定議以聞○以許纘會爲雲南按察使

原任河南按察使

○甲午諭戶部淮揚所屬地方歲比不登屢屢朕

懷今年又遭水災黃淮交漲隄岸衝決百姓廬屋多被淹沒夏麥未獲登場秋禾播種水潦難施民生失所特差部臣速行踏勘准動正項錢糧存積銀米將饑民賑濟但被災之民既無耕穫何以輸糧如再加催科愈不堪命今年淮揚所屬被災地方應徵錢糧共該若干爾部速行酌議蠲免以副朕恤災愛民至意○改內三院大學士學士銜以圖海巴泰爲中和殿大學士兼禮部尚書索額圖李蔚爲保和殿大學士兼戶部尚書杜立德爲保和殿大學

士兼禮部尙書對喀納爲文華殿大學士管刑部尙書事折爾肯  
哈占爲中和殿學士塞黑達都爲保和殿學士馬朗古張鳳儀爲  
文華殿學士靳輔爲武英殿學士田種玉爲文淵閣學士陳鼐永  
爲東閣學士折庫納熊賜履爲翰林院掌院學士俱兼禮部侍郎  
○丁酉諭禮部帝王圖治必稽古典學以資啟沃之益經筵日講  
允屬大典宜卽舉行爾部詳察典例擇吉具儀奏聞○辛丑上  
幸南苑行圍○己酉上還宮○是月免山東濟東濟陽等二十  
九州縣被災額賦有差

十一月丙辰禮部遵旨議覆經筵應照順治十四年例每年春秋  
二次舉行擇於明年二月十七日午時開講前期 皇上親祭

奉先殿及 孔子先師講官聽內閣酌定數員題用經書講章應  
令講官撰送內閣酌量改定務期恭進 御覽禮儀筵宴俱照舊



例其日講日期擇於本年十一月二十一日巳時開講日講官亦俟內閣酌定題用得旨經筵日講開講日期知道了已經設立翰林院其日講官及應行事宜著翰林院酌定具奏○吏部議准左都御史杜篤祐奏降級革職人員於吏部具呈辨復者不一而足是以內外離任各員不論有冤無冤紛紛控訴殊非重名器清銓法之意應請凡降革人員在臣部具呈辨復者一概停止如果有冤抑許仍赴通政使司登聞鼓衙門控告覈明具題從之○己未戶部奏嗣後總督巡撫自一品二品官推授者仍照原品支俸自三品以下官推授者俱支三品俸永著爲例從之○丙寅戶部議覆順天府府丞高爾位奏鄉飲酒禮一節臣府每年舉行兩次照例將漢人中年高有德者選擇敦請臣思八旗下滿洲蒙古漢軍其中豈無有德堪爲賓介者似宜滿漢一體舉行以昭獎勸從之

○辛未定刑部限內監斃處分例○癸酉以艾元徵爲左都御史

由吏部左侍郎遷

○吏部都察院遵旨會勘御史李之芳參劾大學士魏

裔介一疏一魏裔介兄魏裔魯任山東運使敕書內增寫府字雖係大學士李蔚衛周祚看稟魏裔介並未舉正其誤欲令伊兄將知府統轄顯有隱蔽之迹一魏裔介於順治十八年四月再補左都御史本年正月恩蔭需次各員例不獲與至康熙三年魏裔介身爲吏部尙書將伊子魏嘉援前詔准蔭故違令典一魏裔介叔魏櫬祥任江甯府同知弟魏裔訥任淮安府桃源縣知縣本非屬員錢穀刑名畧無關涉特以桃邑荒殘巧圖回避當該撫具題之日魏裔介方爲吏部不行駁正私覬伊弟獲改美任三事皆實理應議處錄在康熙九年五月初六日赦前勿論第魏裔介奉旨回奏不據實引咎乃稱已會劾過大學士劉正宗李之芳與劉正宗

同鄉挾讐誣構又伊子請蔭在魏裔介爲吏部尙書時始行具題  
乃隱諱不言而以都御史任內送蔭爲解殊非大臣之體應削去  
所加之級罰俸一年魏裔魯敕書送部銷毀改給魏嘉削去蔭生  
魏裔訥不許回避仍候桃源缺出補用至考選庶吉士及舉刑部  
主事杜鎮纂修 實錄二事魏裔介無市恩徇情之處李之芳所  
言涉虛亦應處分但疏內三事旣實例得免議得旨魏裔介免其  
削級罰俸嗣後益宜勤慎供職以副朕寬宥之意餘如所議○甲  
戌以淮揚數被水災特命高郵寶應等十五州縣應徵康熙九年  
並帶徵七八年漕糧漕項概行蠲免○乙亥定理藩院郎中與六  
部滿郎中一體升轉○增光祿寺滿署丞三筆帖式四○己卯吏  
部奏 皇上宏敷教化特頒 聖諭十六條以示尙德緩刑化民  
成俗至意應通行曉諭八旗並直隸各省府州縣鄉村人等切實

遵行從之○辛巳轉王清爲吏部左侍郎調曹申吉爲吏部右侍

郎

由禮部調

○壬午改內秘書院大學士魏裔介爲保和殿大學士兼

禮部尚書○吏部尚書馬希納以病乞休得旨准其解任調理病

痊起用○是月免江南高郵等十五州縣水災漕糧及直隸開州

河南考城山東商河湖南瀏陽江南太倉等六十州縣衛被災額

賦

十二月甲申朔浙江巡撫范承謨奏前奉 恩詔以甯波府前明

翰林院編修葛世振舉山林隱逸奉有赴京錄用之旨今本官呈

稱抱病不能起程請俟葛世振病痊之日赴京得旨該撫既稱葛

世振品行端重才學優贍仍著力疾前來以副朕求賢任用之意

○戊子設翰林院滿漢侍讀學士各三侍講學士各三侍讀各三

侍講各三典簿孔目各一待詔各二習滿字筆帖式十六習漢字

筆帖式十六○己丑以田種玉爲禮部右侍郎

由文淵閣學士遷

○癸巳

以莫洛爲刑部尙書

由山西陝西總督遷

○戊申諭大學士等朕近日披覽

章奏於科道官條奏有合於事理裨益政治者虛懷聽納不憚見

之施行其所言無益不可行者非勦襲陳言則浮泛塞責爾諸臣

甯有不知今後有言關政理切實可行者照常票擬朕親加裁奪

其或不可行者若悉下部議既屬無益徒令章奏繁多反致應行

事務稽遲爾等可詳酌事理以不准行擬旨朕仍審擇而執其中

古之聖帝賢王雖邇言是察亦無稽勿聽用言致治之道蓋當如

此○是月免江南高郵等十二州縣浙江烏程等五縣水災額賦

○是歲朝鮮西洋來貢○人丁戶口一千九百三十九萬六千四

百五十三田地山蕩窪地五百四十五萬五千五十六頃八十一

畝有奇徵銀二千五百八十九萬七千九十二兩有奇米豆麥六

百二十一萬一千三百四十石五斗有奇草二百三十萬五千六百五十五束茶一十六萬八千五十引行鹽四百四十二萬五千三百六十一引徵課銀二百七十八萬三千四百八兩有奇鑄錢二萬九千五百四十三千二百五十有奇